



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tiryimiyim@aolima

tir yimiyim

TAPAK 10



Manipur Congress-i CM Biren Singh
dang tatok meshitsü akhanger

ICC Test rankings: Steve Smith
temaba jenjangi tuogo



VOL. XVIII NO. 243 (ADOK 243) DIMAPUR

YANGTEPNÜ (THURSDAY)

AAMI (JUNE) 17, 2021

₹ 5.00

Nagaland nung tsüngsarosa tensa ajurua lir: Minister Kaito

Kohima, June 18, 2021 (TYO): Nagaland nung tzungluruwa menuba aser tzunglu shitak maruba ajanga tsüngsarosa tensa ama ajurua lir, ta Agriculture Minister, G Kaito Aye-i ashi.

Tesüiba kumtem ama masü taküm tzunglu kanga marur aser taruba hopta ishika tsungda tzunglu marura tsüngsarosa khuret ajurutsü, ta pai ashi.

Nagaland nung Mon district dak alaka tanungba tesemtem nung rainfall deficiency 20% nungi 59% tashi ajurua lir ta Nagaland State Disaster Management Authority (NSDMA)-i metetdaksü.

Taküm February nungi May ita tsungda tzunglu maru aser tsünusenbongsü nung Fall Army Worm (FAW) atuba den tzunglu maruba ajanga t s ü n ü s e n b o n g t s ü kongadokogo, ta Minister Kaito-i ashi.

July ita tashi iba amai dang ora aluyimertemi tsünusenbong meyoktetsü, ta paisa shisem.

Mongulbarnü Nagaland Chief Minister Neiphu Rio-i Agriculture aser Horticulture Department tem den senden ka amen.

Senden nung Cabinet minister tema aden aser Agriculture Production Commissioner (APC) Y. Kikheto Sema-i tensa indang osang metetdaksü, ta Kaito-i ashi.

Aluyimertemi khuret ajuruba atema state sorkari Ministry of Agriculture den jembitepdar, ta paisa shisem.

"Tzunglu maruba khuret den COVID-19 tensa ajanga aluyimertem kanga timtemer.

State sorkari iba khuret angateta tensa koktetsü atema akokba tashi mapa inyakdar" ta Horticulture Advisor, Mhathung Yanthan-ia ashi.

Aluyimertemi takoksa anguba asoshi yariteptsü atema Agri & allied department-i September aser October ita alo, Oil seeds, aonsotsü metsüjang alemtsü sentong lir, ta paisa ashi.

"Nagaland nung aluyimer 70% tashi tekong lu ayimertem lir saka December 2020 nungi April 2021 tashi tzunglu balaka maruba ajanga tekong lu junga meyimtet lir" ta APC Y Kikheto Sema-i ashi.

Külen, district ajak nung tzunglu maruba ajanga Terraced Rice Cultivation (upland) aser Wet Terraced Rice Cultivation nunga timtem ajurua lir, ta paisa ashi.

2020-21 küm tsungda Nagaland nung jang 5.51 lakh MT adoktsü ta asadangteta aliba 1.66 Lakh MT dang adoktsü ama kümogo, ta Kikheto-isa metetdaksü.

Tsüngsarosa tensa ajurutsü ama bilemba agi Agri & Allied department temi tekong lu nung atemtsü atema metsüjangtem agütsüogo. Ajisüaka, tzunglu shitak maruba ajanga aginüba ama mapa meinyaktet, ta paisa metetdaksü.

State sorkari Agriculture Production Commissioner (APC) lenisüba kübok Agri & Allied Departments indang Core Committee ka tentetogo.

Sorkarisa Agri & Allied Department ketdangsürtem dang pei pei mapa lezmükdak alitsü aser tensa jungjunga reprangtsü tetuyuba agütsüogo.

Nagaland nung June 30 tashi COVID-19 lockdown atsülanger

Kohima, June 16, 2021 (TYO): Nagaland ajungalen June 30, 2021 tashi total lockdown alitsü sorkari telemtetba agiogo.

Nagaland state sorkari COVID-19 wara anema May 14, 2021 nungi lockdown tenzük aser tang agi pezübenbuba mapang atsülangogo.

"Bodbarnü Chief Minister Neiphu Rio menden ser High Powered Committee (HPC) on COVID-19 senden amendang June 30 tashi lockdown atsülangtsü lemtet" ta Government spokesperson aser Minister, Neiba Kronu-i ashi.

"Nagaland nung anogoshia Covid-19 putetba jenjang 7.5% tashi ajema kümogo aser külen nisung asüba ajemogo. Saka asenok zübazülema malitsüla aser talisa Covid-19 putetba jenjang 5% teküpok aludaktsütsü atema lockdown alitsüsa akümer" ta pai metetdaksü.

Jilattem nung Covid-19 putetba ajema kümogo saka yimtsüngtem nung kanga puteter aser iba ya tebilemstü khuret tulu lir, ta Minister Kronu-isa shisem.

District Task Force (DTF) temi pei pei telongtet nung tensa dak apet tenokdangbatem salatsü mesüra akangshitsü akok, ta paisa ashi.

"Yaküm ama masü takümbo nübertemi süoki ia bilemer aser COVID-19 anema raratsü asoshi latetba SOPs sülen anidaker" ta Minister Kronu-isa ashi.

HPC-i lockdown mapang metembangdang state nung COVID-19 tensa kanga junga reprangdangtsü. Sorkari anogoshi aayangertem atema bilemstür aser iba atema Nagaland State Disaster Management Authority (NSDMA)-i tesem ajungalen dry rations angati agütsütsü tenzükogo, ta paisa metetdaksü.

Sorkari COVID-19 vaccine

agütsüba inyakyim tuluba inyaknür aser tang tashi nung healthcare workers 60% aser frontline workers 75% nem vaccine agütsüogo.

Ajisüaka, arishi küm 45 ser tempur 29% aser arishi küm 18-44 tsungda alir 13%-i dang vaccine agiogo aser iba telok ana nem vaccine timba agütsütsü atema meranger, ta Kronu-isa metetdaksü.

"Tensa tajungba kümdar saka asenok lendong nungibo mejenbo lir. Positivity rate 5% teküpok asütsüla aser asenoki nütsüng yongsük 50% den timba nem vaccine agütsütsü nungdaker" ta Government co-spokesperson aser Advisor, Mmhonlumo Kikon-ia tanü Twitter nung metetdaksü.

"Nübertemi timtem ajuruba onok angateta lir saka tensa ajanga lockdown alitsüsa akümer" ta Kikon-isa ashi.

COVID-19 Nagaland: Anogo 11 buba taneptsü angur timba

Kohima, June 16, 2021 (TYO): Nagaland nung tanü agi anogo 11 buba COVID-19 putetertem dang nungi taneptsü angur timba liasü.

Bodbarnü COVID-19 agi shiranger nisung 374 taneptsü angur aser 111 dak putet. Tanü putetertem zungsema Nagaland nung nisung ajak agi 23,965 kümogo.

"Tanü nisung 111 dak COVID-19 putet. Parnokji Mokochung nung 48, Dimapur o Kohima nung metsütsü (20), Phek o Tuensang nung tenetnet (7), Mon nung 5, Kiphire nung 3 aser Wokha nung 1 lir" ta Integrated Disease Surveillance Project atema State Nodal Officer, Dr Nyanthung Kikon-ia ashi.

"Tanü nisung 374 taneptsü

angu. Parnokji Dimapur nung 229, Kohima nung 81, Mokochung nung 36, Mon o Zunheboto nung tii (8), Kiphire nung 6, Wokha nung 4 aser Phek nung 2 lir. Parnok zungsema taneptsü angur ajak agi nisung 20,127 kümogo" ta paisa metetdaksü.

Tang Nagaland nung nisung 2,699 anepaludar aser positivity case rate 11.35% kümogo, ta paisa shisem.

Bodbarnü Dimapur nung COVID-19 puteta alir nisung ana asüba zungsema tasür ajak agi 461 kümogo. Ajisüaka, tasürtem rongnung nisung 14 bo tanga tashidak ajang asü, ta Dr Kikon-isa ashi.

"Tang tashi nung COVID-19 alitsü akok ta temolung melemi bilemba sample 2,11,133

tendangogo. RT-PCR ajanga 94,645, TrueNat ajanga 59,244 aser Rapid Antigen Test ajanga 57,344 tendang" ta paisa shisem.

"Mongulbar tashi nung Nagaland nung nisung 3,14,363 nem COVID-19 vaccine dose 3,69,238 agütsüogo" ta State Immunization Officer Dr Ritu Thurr-ia metetdaksü.

Vaccine agirtemji frontline workers 59,661, healthcare workers 15,723, arishi küm 45 ser tempur 1,33,395 aser arishi küm 18 nungi 44 alir 95,049 lir, ta paisa ashi.

"Vaccine agirtem rongnung nisung 54,875-i dose anaprong agiogo. Parnokji frontline workers 28,303, healthcare workers 10,309 aser arishi küm 45 ser tempur 16,363 lir" ta Dr Thurr-isa metetdaksü.

ASENOK MOZÜ KITEM ASER YANGJI TEYARI ANGÜTSÜBATEM METETDI (SHILEM-1)

India telongjem kübok koba state nung südirsiaka, nübertem anema lidaktsütsü aser shiranger anepaluba (Public Health Care) mapa ya state nem nunglokja lir, anungji manemtsünemertem aser temang junga alitsü atema teyari aginertem asoshi melamelaa teyari agitetsüsa inyaktetsütsü state government mapa aser teinyaktsü lir. Atangji, state government-i inyakba nung yariseptsü asoshi center government-ia National Health Mission (NHM) sentong kübok state government nem senotsü agütsür aser technical mapatem nung yariteper. Center government-i state shia nem NHM sentong kübok teyari agütsütsü ministry website <https://nhm.gov.in/index4.php?lang=1&level=0&linkid=66&lid=79> nung angutsü.

India nung yimtaklirtem asoshi yanglutsüba mozü kitemji nütsüng yongsük aliba yari jenjang asem (three tier system) nung yangluja lir. Item rongnungji mezüngbubaji, tenem lima nung nütsüng yongsük 3,000 aser lenden nung 5,000 alidak Sub-Center mozü ki ka lapoktsür; tanabuba jenjangji tenem lima nung nütsüng yongsük 20,000 aser lenden nung 30,000 alidak Primary Health Center (PHC) kaka lapoktsür aser tasembuba jenjang nung lenden lima nung nütsüng yongsük 80,000 alidak aser lenden lima nung 1,20,000 alidak Community Health Center (CHC) lapoktsür.

Item mozü kitem rongnungji Sub centre mozü kiji nisungtem asoshi PHC aser CHC mozü kitem dang tama teyari angudak lir. Talisa tenem aser lisa majungba limatem nung nisungtem meta talanglang pilar prokshia alir, anungji item nisungtemji teyari aser mozü nungdakba mapang yakta anepalutetsü atema "Time to Care" ta ser sentong tasen ka tenzük aser iba sentong ajanga tenem aser lisen limatem nung sub centre mozü kitem lapoktsür. Iba sub center-ji yangji aser temeket nung alirtemi tetsüng agi minute 30 nungbo atongtsüsa lapoktsür.

Iba subcenter nungji tajemba agi Multi Purpose Worker tetsür kabosa alitsüla, iba dangji ANM ta ajar aser tebur Health Worker ka alitsüla. Sub center mozü kidangji nübertem rongdak nungdak nung anepalutsü asoshi kanga nungdakba mozü dang kar agütsür. Asenok Sub center-tem nung item mozütemji angati nguya alitsü imlar. Indian Public Health Standards (IPHS) 2012 ajanga Sub center mozü kitem ya tapu ana (2 types) kuma lemsatsüa lir. Sub center type A aser Type B na tsungdaji, Type B sub center mozü kidangji tetsür numongtsü koka kiojen aser teyariteper alitsüla. Iba ama mozü kidang inyaker ANM ana yoka lira, mapa inyakba anogo shia tena rongnung kabo mozü kidangji OPD service atema alitsüla aser idangji ka nungdakba purtem tonga oagi yaritsüla. Type B Sub center nung aliba ANM purtemji tetsür tanur bena aliba mapang anepaluba aser tanur sotsüba maparen nung training junga agiba nisung asütsüla.

Sub centre mozü kitem nungji tetsür temang mazüngi aliba nungi tanur sor külena mozü jem agüja anepaluba tashi reprangtsüla aser kibong nung tanur aika masotsüsa anepalutsüba mapatem nunga teyari angutsü. Iba denji ano Sub center mozü kitem nung temang metaa shirangba, tebok aoba aser first aid nungdakba timtemtem yaritsü aser yangji meyaritetbatem yakta tangaleni yoktsü.

Tetsür tanur bena aliba mapang aser tanur sor külena Sub center nung inyakeritemi ki tonga oa anepalutsüla aser yimtak yimtsüng nung tashidak ali mali reprangtsü aser tebok aoba aser temang metaa shirangba timtem tali tali kumra yakta dang Primary Health Centre nung Medical Officer dang parnokki ashitsüla.

[Iba osang ya Wt.Limatula Yaden, shiba DGHRD, Central Board of Indirect Taxes & Customs, New Delhi nung tang Additional Director General lir aser taoba küm 6 tashi Ministry of Health & Family Welfare, Govt. of India nung NHM Policy Director liasü, lai yokba nungi nübertem ajangzüksü asoshi adoktsür.]

Mokokchung nung special vaccination drive tenzük



Dimapur, Aami/June 16 (TYO): Arishi küm 45 aser tema aser PWDs (arishi küm 18 aser tema) atema special vaccination drive ka CMO Office, Mokokchung nung June 16, 2021 nü tenzük a liasü. Iba drive ya Mokokchung Municipal tawabangba kübok ward 18 aser temeket nung

aliba Chuchuyimpang aser Mokokchung yimtsüngtem nung June 16 aser June 18, 2021 anogotem agitsü, ta sangdong ka ajangab ashi

CHILDLINE Dimapur ajanga online sentong ayongzük

Dimapur, Aami/June 16 (TYO): COVID-19 tashidak wara aser iba mechi lockdown ozüing benokba ajanga nisung timba kilung nung shibanger alitsüsa kumogo.

Yamaji lockdown yagi tanurtem jenjang balala nung kanga jangja kongshia yimya tasenba ya ajanga parnok medemertem den asaya metettepba, jangratemtsü mapa balala inyakba aser tasen angazükba yimyatem makai akumba ngua, tanur aser tsürabur nem asaya-menü, khuret maliba mapang agüja aser parnok mapang amajok nung meindokdaksütsü nükjidong nung CHILDLINE Dimapur ajanga "Plastic Waste to life" omen nung ajemdaker online nung tetoktepba aser

inyaksangshi balala ayongzük a liasü.

Tetoktepba ya arishi küm telemsa nung telok balala lemsar May 16, 2021 aser June 5, 2021 tsüingta anogo balala nung agia liasü. Iba sentong nung Christ Deemed to be University, Bengaluru nung azünger Shalu Kumari aser Shania Singhania Agarwal nati yaritepa agia liasü.

Mezüing anogo session ka nung khen amshiba plastic oset ajemba, tanaben amshiba aser recycle asüba lenmang aser yimyatem sayua amshir aliba plastic bottle aser container tem agi planters, hanging planters, pen-stand aser box balala yanglua liasü. Parnok dang acrylic paints, süoshi, wool aser angüsü tejentem amshia parnoki

yangluba model tem tebour tajungba kumdaksütsü sayua liasü.

Tastingji tanurtem ya 'free hands painting' nung shilem agia liasü. World Environment Day anogomung nüngtem nung shilem agirtem dang libajen wazüka ayutsü angazükdakja süngdong temdaksü.

Iba sülen arishi küm 11-16 tsüingta tanurtem asoshi "Plastic waste management" omen nung essay zülutepba sentong ka ayongzük a liasü.

Iba sentong kübok tetoktepba shia takok angur ajunga nem senpet den e-certificate agüja liasü.

CHILDLINE Dimapur ajanga ayongba iba online sentong nung tanur 165 shilem agia liasü.

Shishilempaba tsütsü sorkari temolung agütsütsüla: NVCO

Dimapur, Aami/June 16 (TYO): Naharabari, Dimapur nung aliba dokan ka nung jang den 'plastic rice' (plastic jang) meyoktep, ta tai tonglokja aliba maparen ya aibelen tulu aser nüburtem asoshi lendong tulu aketba inyakyim lir, ta Nagaland Voluntary Consumers' Organisation (NVCO) ajanga sangdong ka nung ashi.

Ochimashi shishilempar temi state nung iba amala maparen inyakba ya NVCO ajanga tatok magütsütsü aser maneni Dimapur Administration, Police, Food and Civil Supplies, Food Safety Officer aser par team dang civil society aser colony lenirtem teyari nung maneni mera tajungtiba agia aibelener merenshitsu ajungshir, ta ashi.

Laboratory nung tendangtsü atema sample yokogo ta angazük, aser iba ken o nung tendangba osang ya alitsüla. Ajisüaka sample tendangba nung plastic mali ta ngutetyonga, ibai mapa tamajung inyakba ken o tesashi ka lir, kechiaser jang masüba meyoktepogo aser iba dokan

mesüra go-down ya ozüing alema inyakba aika nung dena aliba amai angur, kong 'fresh packing' tesüdak liasü, ta ashi.

Iba ken o nung telok aikati densema alitsü akok, kechiaser sensaker, anogoshi aayanger, tila-teri yokyayokchir, yimtung nung yokyayokchirtem khuret zünger mezüingma ajurua lir, aser item rongnung jang-o-tzü nung jenjang atoba, Department of Food & Civil Supplies, Govt. of Nagaland ajanga National Food Security Act kübok lemtsüba jang agi meperiba/ajema agütsüba mesüra sen temlokba densema lir, na NVCO ajanga ashi.

Tawa ang state department aser NVCO lungjemer June 7 nü "World Food Safety Day" mungler lia iba ama chiyongtsü nung tim masüba mapa inyakba ya maksü lir aser iba ya ajanga asen temang nung timtem tulu agütsütsü, ta ashi.

Nagaland nung shishilempar temi yamai tim masüba mapa bulua inyakdaksür, ta NVCO ajanga state sorkar dang asüngdanga liasü.

Tawa Kohima nung LPG

nung shilem 70 bo tzu aliba ken o ka adok, koba danga state mesüra yimtem nung kodanga matalokba maparen ka lir, ta ashi.

State sorkari item ozüing alema inyaksangshiba süoki ia reprangtsüla, kechiaser state nung tang tashidak wara mechi nüburtem tali timtemba mapang iba ama maparen yagi nüburtem tali lendongi yoker, ta NVCO ajanga ashi.

Aibelener nem tapet temerenshi agütsütsü mechi state sorkar indang machineries ajanga ken o ya süoki ia bushisüngdangtsüla aser tarutsü nung iba ama maparen meinyakdaksütsüla.

Kasa mapang nüburtem teti saksalema alitsü ayongzük, ta sangdong ajanga ashi.

Iba ama mepetmesü aser timtem ajuruba mapang nüburtemi State Consumer Helpline indang Tool Free telephone No. 1800 - 345 - 3701 nungi osang agitsü, lenmangtem asüngdangtsü mesüra timtem ajuruba lemsateptsü ayongzük, ta NVCO ajanga ashi.

Kohima Police-i ki rakpoka auyar apu

Dimapur, Aami/June 16 (TYO): Ministers' Hill Baptist Higher Secondary School (MHBHSS), Kohima nung ki rakpoka auyaba nung tai tonglokja alisang Kohima Police nungi team kati June 15, 2021 nü pua liasü, ta sangdong ka ajanga ashi.

Iba nisungba ket nungi sen 1,52,390 nguteta liasü.

Iba nisungba ya PO/PS - Longleng, Dist - Longleng kübok Yachem yimtsüng nungi Akangba Phom'er jabaso arishi küm 22 tain aser tang tang Paira colony, Burma Camp, Dimapur nung telidak Daniel Phom, ta jangjatetogo.

Iba maparen dak



sendakba nung maneni bushisüngdangtsü atema ken o ka South Police Station, Kohima nung benokogo, ta sangdong ajanga ashi.

Security Forces temi NSCN (K-YA) züingsem ka apu

Dimapur, Aami/June 16 (TYO): Security Forces temi police den lungjemer June 14, 2021 nü Mon district kübok Sangsa yimtsüng nung operation ka agiba mapang NSCN (K-YA) züingsem ka pua liasü, ta sangdong ka ajanga ashi.

Osang tejangja ka nung ajemdaker Security Forces aser State Police temi Nagaland aser Arunachal Pradesh arrtsü nung aliba Sangsa yimtsüng nungi

NSCN (K-YA) züingsem ya apu, shibai iba tesem nung tashiyim amshia senotsü saruba maparen nung shilem agia liasü.

Pa ket nungi ozüing alema senotsü saruba (extortion) slip tem nguteta liasü, ta sangdong ajanga ashi.

Pua alisang den pa ket nungi ngutetba osettem ya manei bushisüngdangtsü atema Namsa Police Station, Mon nem amoktsüogo, ta osang ajanga ashi

Deputy Commissioner, Tuensang ajanga mepishir

Dimapur, Aami/June 16 (TYO): District nung tang COVID-19 tensa aser lockdown tenokdangbatem benoka aliba mechi, kanga tongtipang masüba dokan aser business tila tem kanga mejungi akoksar lir, ta Deputy Commissioner aser Chairman, District Task Force for COVID-19, Tuensang, Kumar Ramnikant, IAS ajanga sangdong ka nung ashi.

Ajungji June 11, 2021 nü District Task Force on COVID-19 pur senden nung lemtetba ama, dokan aser business establishment indang ki kibur dang tang iba ama timtem mapang aria bilema lockdown mapang shibangba dokan tem dang ita ka atema ki para (rent) atoktsü mepishir, ta Deputy Commissioner, Tuensang ajanga sangdong nung ayongzük a liasü.

MoFA ajanga Tuensang atema Oxygen Concentrator agütsü



Dimapur, Aami/June 16 (TYO): Deputy Commissioner aser Chairman, District Task Force for COVID-19, Tuensang, Kumar Ramnikant, IAS ketdangtsüba kübok Medical Oxygen for All (MoFA) nungi Tuensang atema June 16, 2021 nü Oxygen Concentrator tuko agüja liasü.

Item oxygen concentrator tem ya district nung COVID-19 tashidak wara den raraba nung amshitsu. MoFA ajanga teyari agütsüba asoshi

pelashishia agizük, item oset ya Deputy Commissioner ajanga Chief Medical Officer, Tuensang nem amoktsü.

MoFA ya India aser Australia nung India nunger tajangzük mebushiba temolunger telok temi tentetba lir.

Parnok nükjidong ya alima tesem balala nungi medical grade oxygen concentrator aser danga medical osettem bendener India nung district tem jangjateta sorkar teyari amshia item oset amoktsütsüba lir.

Assam nung Covid19 agi shirangertem home isolation mesüdahtsütsü

Guwahati, June 16, 2021 (Agencies): Bodbarnü Assam Cabinet-i Covid19 agi shirangertem pei kidang facility balaka melira home isolation mesüdahtsütsü ta telemtetba agiogo.

Tanü chief minister Himanta Biswa Sarma menden ser Cabinet senden amendang iba telemtetba agi.

May 25, 2021 nü CM Sarma-i Dhubri district semdangdang

state sorkari Covid19 ahi shirangertem home isolation facility anentsü atema sentong renemer ta osang metetdakja liasi. Tesüiba ghonda 24 tsüingda Assam nung Covid19 agi shiranger nisung 34 asüba sülen Assam Cabinet iba telemtetba agiogo.

Tanü parnokisa Class 10 aser Class 12 final tatidang agitsü aliba magidakhtsütsü telemtetba agi.

"June 18, 2021 nü Higher Secondary Leaving Certificate (HSLC), Assam High Madrassa (AHM) Examinations aser Higher Secondary final examinations atema tatembang telemtetba ka agitsü" ta Sarma-i metetdakhtsü.

Külen, Assam nung kaketshir kari Supreme Court nung Covid19 wara ajanga HSLC aser HS tatidang athitsü atema temepishiba ka benoka lir.

Manipur Congress-i CM Biren Singh dang tatok meshitsü akhanger

Imphal, June 16, 2021 (Agencies): Manipur Chief Minister Biren Singh-i kechisarena nung jenjang atuba indang jembiba atema tatok meshiang ta Manipur Congress-i takhangba agütsür.

Covid wara agi timtemba mapang CM Biren Singh-i nübortem mezüingmeshiogo, ta parnokisa ashi.

Hokolbarnü Congress-i totzü nung jenjang kanga atuba anema lungkak aitba atema Manipur Chief Minister Biren Singh-i "Centre sorkari nübortem nem jang aser Covid vaccine angati agütsür" ta langzü.

"Centre sorkari jang aser COVID vaccine angati agütsüba den tanga mapatem inyaker aser temji atema totzü jenjang kanga atur" ta pai ashi.

"Iba atema jenjang ka lir aser

angati teyari agütsüba ya anüing nungi tzünglu aruba ama masü" ta Biren Singh-isa ashi.

"CM Biren Singh-i tebilemstü kecha melii aser public mezüingmeshia jembio. Iba ajanga state sorkari sensakertem atema mebilemstüba sayur" ta Manipur Congress-i ashi.

Manipur nung BJP sorkar akümba sülen state nung alirtemi petrol aliba nung tax Rs 702 crore agütsüogo ta parnokisa metetdakhtsü.

"Chief Minister-i taoba Congress sorkartemi küm 15 nung kechi inyak ta asüingdang. Anungji ni pa dang taoba Congress sorkar mapang na (Biren Singh) Cabinet minister inyak masü na ta asüingdang" ta Manipur Congress president Govindas Konthoujam-i ashi.

Tripura BJP sasep nung mepetmesü tuluba akümer

Agartala, June 16, 2021 (Agencies): Tripura BJP sasep nung mepetmesü tuluba kümogo aser iba jagi Bodbarnü BJP central leaders 4 tashi state-i aruogo.

Lennirtem rongnung BJP national general secretary BL Santosh aser Tripura in-charge Vinod Sonkar na dena lir.

BJP central lennirtemi party nung temolung masüba MLA tem den ajurutepa angatetteptsü merangtsü ta osang angazüker.

BJP party MLA aika Trinamool Congress (TMC) nung adentsü ta jembir aser iba jagi central BJP lennirtemi Tripura-i arutsüsa aküm.

Chief Minister Biplab Deb-i 2019 küm Sudip Roy Barman cabinet nungi züngdokba sülen nungi Tripura BJP nung telok kati pa den toktepa arur.

Tripura BJP MLA Sudip

Roy Barman ya Mukul Roy sülen anidaker ka lir aser tawa tu Roy-i BJP toktsür TMC nung tanaben denogo.

TMC tenzükerterem rongnung Mukul Roy ya züngsem ka lir.

Trinamool Congress (TMC)-i Tripura dak tenük yoker aser Tripura TMC president Ashish Lal Singh-i Tripura nung BJP lennir aikati Biplab Kumar Deb-i aniba ochimashi sorkar atsüngdokhtsü atema jembitepdar ta shiogo.

West Bengal nung BJP-i o tulu jembiaika Mamata Banerjee-i parnok madak takok tulu anguba sülen Tripura nung BJP, Congress aser CPI-M züngsem aika TMC nung adener, ta Ashish Lal Singh-isa metetdakhtsü.

"Hopta ana tsüingda Tripura nung TMC akangakanga kümteter inyaksangshitsü" ta paisa ashi.

GOVERNMENT OF NAGALAND DIRECTORATE OF INDUSTRIES & COMMERCE NAGALAND : KOHIMA ADMISSION NOTICE

Online applications are invited from interested candidates for admission to different levels of Diploma course (Voc) for the Academic Session 2021-22 at Nagaland Tool Room & Training Centre (NTTC), Dimapur. The courses are offered under NSQF through Community College Programme under AICTE, MHRD. Course duration upto 3(three) years are mentioned below:

Sl.No.	Name of the Course	Diploma	Duration	Eligibility
1.	Diploma in Automobile (Voc.)	Level-I	1 Year	Class X pass and above
		Level-II	1 Year	Dip. Level-I Pass
		Level-III	1 Year	Dip. Level-II Pass
2	Diploma in Electrical Equipment Maintenance (Voc.)	Level-I	1 Year	Class X pass and above
		Level-II	1 Year	Level I Pass (Level-II)
		Level-III	1 Year	Level II Pass (Level-III)

Registration can be done ONLINE at
<https://nttcdimapur.org.in/>

Apply on or before 30th June, 2021

Important information:

1. Students are applicable for scholarship under Deptt. of Higher & Technical Education
2. Registration fee Rs. 200/-
3. Admission to the course will be on first come first basis.
4. Hostel seats available.

For further details, visit the website: <http://www.nttcdimapur.org.in>

* Email Id- nttcdimapur@gmail.com

or contact the following enquiry numbers.

(For Automobile - 7005091991 / 7005845090) * (For Electrical - 8787846646)

(Reception desk - 8257002079)

Sd/- Shri. K. Hokishe Assumi
Director

* Website: www.nttcdimapur.org.in * Email-ID nttcdimapur@gmail.com

NTTC, New Industrial Estate, Sub-Jail Junction (Tinali), NH-36 Diphu Road, Dimapur: Nagaland



RINGWORM, ECZEMA
ASER TEMANG
MESAKBA AGI
TIMTEMER ASÜ?

HAO



ZALIM LOTION

Fastest > Trusted > Tested

...By Generations

Medical
store
nungi
aliang

Retailers may also buy online : www.zalimlotion.in ✉ zalimlotion1929@gmail.com



TIR YIMYIM YIMOBILEM (EDITORIAL)

DIMAPUR YANGTEPNÜ, AAMI (JUNE) 17, 2021

Plastic Jang

- P Tiamongba Aier

Mongulbarnü Dimapur nung jang tajung den 'plastic jang' meyokteper ayoker ta video ka prokshiba ajanga asenok aoksadaksüogo aser ya shitak asü masü ta asüba osang metettsü yongyaseta atar. India nung plastic jang amshiba osang ya küm ishika tejangdang nungi asenoki angashia arur. Ajisüaka, tesüiba tatalokbatem repringdanga ora plastic jang indang kuli tejangja kecha menguteti lir. Alima nung 'plastic rice' ta mezüing adoka jembibaji 2010 küm China nung liasü aser iba dang 'Wuchang rice scandal' ta ajar. Iba mapang company kari 'premium Wuchang rice' ta ser tanga jang nung teronem menemba kar enoksemer ayokba inyakyim ka China ketdangsürtemi puteta liasü. Iba tatalokba sülen 2011 küm South Korea nunga company kari alo, shi (sweet potato) aser plastic meyoktepa jang yanglua ayoker ta osangkaket ka nung adok aser iba nungi 'plastic rice' ta asüba oren kanga bulua jembitsü tenzük. Ajisüaka, iba mapang Korea nunga 'plastic jang' indang kuli tejangja mengutet. Küm ishika tejaklen China nung mapa inyakertemi kol (machine) ka nung plastic tamajung enokba aser iba sülen jang mesüka mesüingmesünga plastic menüngzuka sayuba video ka prokshi aser ibaji plastic jang yangluba lir ta osang prokshia liasü. Saka, iba mapangjisa factory ketdangsürtemi industry nung amshitsü atema 'plastic granules' yanglur ta kuli agütsü. Iba tatalokba sülen, maneni 2016 küm nunga Nigeria ketdangsürtemi plastic jang tonne 2.5 apu ta osang ka kanga prokshi saka Nigerian Federal Ministry of Health-i ibaji olulu ka dang lir aser plastic jang amshiba kuli kecha mali ta osang jangjashija liasü. Alima nung jang yangluba koltem amshir aser iba nung jang tamajung mesüra tanga chiyungtsütem meyokteper jang mesüka menünger aser item kol nung yangluba jang dang artificial rice mesüra synthetic rice ta ajar. Artificial rice ya tapu aika yanglua amshir aser kaji menti aser alo menüngsar yangluba lir. Iba dang plastic jang ta-a ajar kechiyong iba jang ya artificial yanglur aser alu nung adokba jang masü. Ano, jang teraksa mesüra tamajung nung tashi aitba mozü aser chiyungtsütem meyokteper artificial rice mesüra synthetic rice yanglur. Alima nung chichiba jang masü saka jang mesüka yangluba tapu aika yanglua chiyunger aser item rongnung NutriRice, Ultra Rice, Corn rice, Konjac rice amala dena lir. Item jang ya tereprangtsü nungbo jang ama dang lir. Snopes ta ser alima nung tatalokba balala jungjunga bushisüngdanga osang lemsatepa website ka lir aser parnok ashiba agi plastic jang ta jembiba ya tiyazü aser olulu prokshiba dang lir. Plastic jang yanglura melamela ajitettsü aser iba jangji sorodang tatsük agi yimsaa oadoktsü. Ano külen, jang chichiba dang nungibo plastic jang yangluba nung ang sen timba endoktsü ta Snopes-isa metetdaksüogo. Maneni, India nung plastic jang amshir ta asüba nung tamangtsü mali kechiyong India nung jang peria dang adoker. Külen, 2018 küm Minister of State for Consumer Affairs, C R Chaudhary-i tatalokba balala bushisüngdanga aruba sülen Lok Sabha nung plastic agi yangluba jang aser shini indang kuli kecha nguteta mali ta shiogo. Item tatalokbatem aser kulitemji repringdanga, plastic agi yangluba jangbo malitsü ama bilemer anungji asenok kangabo maoksatsüla. Hao, yakünü video prokshiba nung tu jang tapu balala ana aliba kanga junga sayuogo aser tenük agi repringdangbo plastic jang ta ashiba tamangtsüka ka lir. Saka, ano kasa dokan nung yangluba tanga video repringdanga, iba tesem nung jang tapu balala meyoktepa bosta nung tanaben asepa angur. Anungji, bosta ka nung dang süaka jang tereprangtsü tapu balala alibaji iba jagia asütsü akok. Ano, shibai metet shishilembartemi parnok ajangzüktsü atema jenjang dalang agi 'artificial rice' mesüra 'synthetic rice' ta ajaba bener arua jang tajung den meyokteper ayokera asütsü akok. Iba indang kuli tejangja mangu tashi aser talisa Food & Civil Supply department aser Food Safety Department nungi sample tendangba osang mangazük tashi asenok plastic jang chiyunger ta mebilemi atadi.

OLEMSABANG

LOCKDOWN MASÜ MOZÜKI TAJUNG ASER INYAKER PERIA MESHIDI

~ S. T. Yapang Lkr. Kohima

Iba covid-19 wara asen Nagalimai arur joko küm ajunger, saka ya tebilemdangtsü tulu lir ta repringteter.

Tang covid-19 puteta alir mozüki nung ishika anepaludar, saka kinungerbo ki meshibanger aser shirang nung dang tendangtsü ta asür, puteta alisang meshiranger nung kudasür par kinunger shirangba atatsü? Ya asayamenüba maparen ka mesüka lir, anungji covid-19 ya metendangtsü aser lockdown ya malitsü, shiba shirangdir pa/la dang mozüki bushitsü, mesüra ya azüoktsü tim ta bilemra puteta alir kinunger aser parnok olioraba ajak tendangtsü tim. Ajimesüra iba wara yaki talir ajak tonger mozüki nung masem nongdentsüa menua mali.

Tang nübur aser kin telungjemtemi lockdown meshitsü melen, mozüki shia doctor aser nurse peria shimtsü, iba den mozümora tajung peria akangtsüla, tang CHC mesüra PHC ka nung nisung noklangka iba wara yaki tonger oxygen nungdakra ajakji peria lir mali? Aser nisungtemji yamaji sür südaksütsü asü koda? Light tao den külemi mozüki nung akaba kecha mapa meinyaki kümra koda? Asen lima light taru maka, süra asenoki ola madoki yamai dang lira ano putusa putua yamai dang alitsü, arung asenoki mozüki shia Generator tajung meshizükdi, iba den ishiba agia CHC nung Doctor pungu aser PHC nung asem meshitsüla, aser mozüki shia ICU inoktsü akangtsüla, Nagalimai sen marur masü, tanga nung indokba sen tera ajemer, mozüki tsütsülen temulung agütsütsü Govt. dang takangba ola yoktsü tajungtiba mapang lir, corona ya süiaka asenok mozüki aser inyaker tajung teti nungdaktsü. Ajisüaka mozüki tajung aliba agi iba wara azüoktettsü ta mebilemi, temesüng lima nung ang azüoktetter lila. Asenoki Govt.-i latettsüa aliba SOP tashi anga anidaktsü tim.

Mozükii aobaji shiba südir shirangba mesüra timtem ka ali agiang aor, tang ama wara koba tangu mesashitetba tebilemtsü adoker ya kanga tulu, minute ka majungdang nisungbaji süadoktsüba maparen ka lir, shiranger aser kinunger ajaki mozüki atongtsü yongyaseta kima tatong den külemi oxygen inoktsüa anepalutsü imlaseta arur, ya inyakertem asoshi tayongzükba wadang tuluka lir, tang tashi kanga junga inyakdar ano tali tashi itshir bendanga agütsüa inyaksü ayongzükter.

Covid-19 agi shiranger nisung balala den jembidangogo, tesem kar nungbo Doctor aser nurse khen danga tonga marui shiranger kija toktsür, kar nungbo kinunger tanüker ka ana alitsü melar. Bilemdangdi asen kija ki ka nung shibanger ayu nung anema alira aika shiranga akümstsü, külen asenok nüburtemi metettsü kaji mozüki nung inyaker timbaka iba wara yaki tongra shibai anepalutsü? Parnok taküm kümzuka alitsüji mezüing mera ka lir. Saka mozüki nung corona putetar sür shibangtsüba ya tim masü. Inyaker putettsü, tasüa asütsü akok, ibaji aben mozüki shibangtsü na? Shiba putet mesüra kong putet item taktangji mozü agi tekaraba nung shitoker lapoktsü masü na? Mozü agi shitoksü maka asü mozü agi shitokba nungji temulung malemer?

Asenok aikadi shiranga doctor ajurudangogo, doctor-i asen temang nung amdanger "ajungjako" ta ashiba oji shirang ajungtsü tenzükter ka akümer, tang wara agi kongshia anepalutsü tasak, saka Doctor-temi shiranger aliba taktang telungi meyinüra kima nungi danga "koma lir?" ta asüngdang nung shiranger aika asoshi aji mozü tajungtiba asütsü. Tang ya mozüki aika nung inyakertemi Corona agi shiranger tonga arua yariba tatalokba lir, iba mapang shiranger aser kinungeri tepela nüktzü yima "tanga nungbo yamai meyarir, kechiba nenokibo onok anasa arua anepalur?" ta ashi nung "onok ya nisung tasür aliba kümzüktsü azüngba aser tejangraba ajak agi ibaji lir, ya onok mapa" ta langzür, koda tesüngmangtsüka parnok temeim aser aria bilembaji.

Yaküm lockdown lapokba sülen nungi taküm tanaben lockdown tashi asenok aika iba corona ya mena lir ta bilemdi, anungji temang mejungra tekaraba nung tendanga anepalutsüba dak alaka menua yura asen dang masü kinunger ajak asoshi takoksa asütsü, shibasa tendanga corona positive ta angashidir aoksatsü melen yakta putetba asoshi kanga pela bilemstsü tim, ajimesüra tetsübu agi asenok aika süadoktsü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Myanmar nung Khristan refugee tem Tenla kidang jenoker



Myanmar kübok Namti jila nung Kachin Baptist Convention nungi putir, Peter Hka Awng Tu-i refugee tem Arogo Tenla kidang jenokdaksütsü atema arem nungi anir adokba noksa nung angur.

June 16, 2021: Tang Myanmar linük nung sepaitem aser lisopur telok balala tsüngda rara ano tamajungba akümba ajanga pei ki toktsür jenshirtem Khristan densema nisung aika Tenla kitem aser convents nung jenokdar.

Rara ajanga Kayah, Chin, Kachin aser Shan state tem nungi jenshir refugees meyrjang aika Tenla kitem nung jenoker; Arogotemi tamangba yimsü kecha mebendangi kanga taintem, tanur, tetsürtem, shirangertem aser matamabensartem densema pei ki toktsür ajenertem ajak Tenla kitem nung jenokdaksütsü telemteba agia liasü.

Kayah state nung aliba Loikaw Arogo nunga nisung meyrjang aika jenokdakja liasü. Iba Arogo nung Chancellor, Francis Soe Naing-i, rara ajanga jenshirtem Tenla kitem nung jenokba ajanga parnok lendong nungi jenbutüsü ta parnoki bilemer, ta

metetdaksü.

Tawa sepaitemi injang aser shells amshia Tenla ki aika amakba mapang nung jenshirtem karbo arem nung jenoka lir.

Pekhon kübok Tenla ki pongu nunga nisung 10,000 dak tema jenoka lir.

Osangbener den jembidang putir, Soe Naing-i, "Loikaw nung arem nung jenoka alirtem atema onoki camp sütsüdar," ta metetdaksü.

Tawa Myanmar nung sepaitemi Loikaw nung aliba Tenla ki asem raksatsü.

Tawa Arogo lenirtemi sangdong ka ajanga, "Yimlibilema rara mapang nung tekülem kitem kümzüka ayutsü atema international telemteba bentshütsü; rara mapang nung Tenla kitem, pagodas, monasteries, mosques, temples, schools aser hospital tem ya refugee tem tejenokdak ama züngshir," ta metetdakja liasü.

Anüolen Myanmar nung aliba Chin state nunga nisung

meyirjang aika arem nung jenoka lir aser Khristantembo timbaka Tenla kitem nung jenoka lir.

Mindat jila nung aliba Sacred Heart Arogo nung putir, Joseph Se Thang-i, nisung aika arem nung jenokba sülen nisung 120 bo meyipa arua tang Tenla ki kima jenoka lir, ta metetdaksü.

Tenla kitem aser telongtet nung nisung meyrjang aika jenoka lir, aser Arogotemi parnok nem chiyungtsü aser mozü agütsür.

Buddhist nütsüng timba aliba Myanmar linük nung Khristan nütsüngbo shilem 6.2 dang lir.

Tang Myanmar kübok Kayah, Shan, Chin, Kachin aser Karen state tem nung sepaitem aser lisopur telok balala tsüngda rara tenzükbä sülen nisung 175,000 dak tema jenshiogo.

Nütsüng million 54 aliba Myanmar linük nung Kachin, Chin, Karen aser Kayah state tem ya Khristan nütsüng aika aliba state tem lir.

Indonesia nung pastor Yeremia tepsetba bushisüngdang tenzüko

June 16, 2021: TNI (Indonesian National Army) sepaitemi tamalen Protestant pastor ka tepsetba sülen June 5, 2021 nü sorkar tetuyuba nung ajemdaker Independent medical team kati Protestant pastor post mortem agiogo.

Papua kübok Intan Jaya district nung aliba Gospel Tabernacle Arogo nung pastor, Reverend Yeremia Zanambani tepsetba sülen par Arogoi Indonesia sorkar dang pastor tepsetba tatalokba maneni bushisüngdang, ta takhangba agüja liasü.

Yaküm September 19 nü arrshi küm 67, pastor Yeremia tasü mang par kima angu. Pa ya Papua nung Intan Jaya district kübok Hitadipa yimdak liasü.

Pa asüba sülen Indonesia nung National Commission on Human Rights (Komnas HAM)-ia pa asüba tatalokba bushisüngdangogo.

National Commission on Human Rights-i bushisüngdangba sülen parnok sangdong ka ajanga, sepa ka- Alpius Hasim Madi-i pastor tepset, ta metetdaksü.

Yaküm November 2 nü osangbener den jembidang National Commission on Human Rights commissioner, Mohammad Choirul Anam-i, "Nisung ka tasür lia pai nisung ana dang, pastor tepsetba tesem nungji pai pa (Madi) den sepa asem-pezü shi angu, ta kuli ashiba nung ajemdaker iba osang jangja," ta

metetdaksü.

Pastor mekhaset dang tamasa reshikangshia liasü.

Indonesia sepaitemi linük nung sepaitemi meimchir temeden alema inyakba kanga mimshir, ibayongji post mortem agitsü atema independent team dang ang tuyu, ta sorkari metetdaksü.

Osangbener den jembidang Intan Jaya district nung police tongti, Sandy Sultan-i, Makassar, South Sulawesi nung aliba Hasanuddin University nungi forensic team kati post mortem agi aser sorkari shimtetba team ka nung Chairman, Benny Mamoto, Komnas HAM aser asür kinünger kati kuli asü, ta metetdaksü.

ANO GO ABEN TSÜNGREM DEN

Meshiang aser nai angutsü

Nenoki meshir, saka mangur, kechiaser nenok pei azüabung nung endoktsü asoshi nenoki aibelena meshir. Yakob 4:3

Yakobi iba shidi tamangertem dangi zülu - kin ter ana prokshia alir dangi zülu (1:1). Apijemtsü Shin kaket nung ama pai shisa kaa alitsü indang zülu, aser pai temeshi liba-liro aser Tsüngrem O nung tashi angaba dak ranglok. Angashitsü karaang, jembitsü meilungi süang, ain adoktsü milungi süang, tsürabur malir aser amitsür semdangang, temeli azüokang; aser ne tamang akangakanga liang.

Idangji pai kechiba parnok nungdak asüngdangtsüla aser koda asüngdangtsü iba indang jemi. Nübur rongnung Tsüngrem nungi item kuli asem rong nung ka mesüra kati anünga lir: 1) Parnok makar kechiaser parnoki masüngdang, 2) Parnoki tai meshir, aser 3) Parnoki Tsüngremi mulungba ama masüngdang.

Laishiba ajunga nung asenoki Tsüngrem dang koda meshitsü aji shia lir. Aiben Yisui meshiang aser nenoki angutsü ta ashi (Mathi 7:7; Luke 11:9). Asenoki kechisa meshir aji asenok nem agütsütsü ta Yisui ashi (Yohan 15:7). Yohani ashi, asenoki kechisa meshidir Pai agütsütsü ta asenoki amangtsüla (1 Yohan 5:15). Tejen Lai nung Dawid ashi, Tsüngremi asen mulungjangi jangraba ajak agütsütsü (T.Ken 37:4). Süra kechiba asenoki asüngdangba asenoki mangur? Idakji tama metettsüba ka lir. Asenoki tebilemba shitak agi meshitsüla; asenok Pa dak alitsüla; asenoki Pai mulungba asüngdangtsüla aser Pa O azüngba aser sarasademba ajanga asenok Pa dak pelaa alitsüla. Sempet tajung ajak Tsüngrem nungi lir, asenoki koda Pa dang asüngdangtsüla aji dang asenoki metettsüla.

Tsüngrem, Nai mulungba ama onoki asüngdangra tasüngdangba ajak agütsütsü nangzük nung Ne tenüng asanger. Amen.

Kentener/actress Grace Wan-i Khristan film 'Done' sayaogo



Grace Wan

June 16, 2021: Tan ita tetenzüklen nungi Khristan film tasen ka cinemas nung sayadar; Khristan film "Done" ya Canada nung kentener aser actress, Grace Wan-i produce asü aser William Cloud-i film otsü zülu.

Film otsü nungji, alima nung nisungtemi mapa tajung inyaktsü bilemer saka mojingi tiyongtsü mapa inyaka nisunger mangdang raksatsüba indang otsü lir.

Grace Wan ya tamalen Independent Film of Blood Work Production nunga production assistant inyaka liasü.

Done film nung tongti actor ji tawa tzü nung Baptir tepoukdak nungi alusang, Christian James lir. Tesüiba küm asem pa tepoukdak aliba

mapang nung pai, atangji meimchirtem ya alima nung metzü aser tesangwa lir, ta rateta liasü.

Khenkhenbo meimchirtemi koda masüba jenjang ajurua telemteba agitsüsa akümer. Yamaji Christian James-ia pa tzü nung Baptiba tetezüji Kibubai pa ajaba asü mojingi ashioktsüba, ta kanga shisadanga liasü.

Grace Wan-ia la taküm nung tayongzükba aika ajangshia liasü. 2006 küm lai TV singing competition show ana-Canadian Idol aser Rock Star nung shilem agia liasü. Lai mezüng shilem agiba film ji "Shampoolzed" lir.

Film yanglurtem dang pei dak aliba sempet nung tamang akatsü ajungshia lai, "Nü mangdang nungi matsüngshitsüla. Tamasabo nai tamakok angutsüa akok, ajisüaka na pelatsü aser takok angutsü atema ajak merangdangang aser balaka inyakdangang. Na kentenba telok ka nung lira nai kongki ka dang matemtsüla saka ken tennang, ken mejemang, piano, gitar, bass aser drum ajak temdangang. Nü dak aliba sempetji ajak dang sayuang. Nai takok angutsü atema mapa ka dang masü saka ajak merangdangang," ta lemsatpe.


OLONG PAITEP # 5847

	1		2							3
4					5		6			
7										
			8						9	
10								11		
							12			
13								14		
15										

TIPILEN		LANGTSÜNGLEN	
1. Taochi sayuba	- 10	1. Menungra	- 6
4. Temezüng agi kongshi	- 4	2. Mi tsükloker mesepba	- 4
5. Ainer	- 6	3. Süngo o tzü ajemba	- 5
7. Chiyungnü	- 3	5. Temenemtsü tajung	- 7
8. Mi nung atsük	- 5	6. Idak	- 4
11. Asen masü	- 3	8. _____ ok	- 4
13. Lenmang ajurutepdak	- 6	9. Tebangi apuba kongki tapu ka	- 6
14. Yangi masü	- 4	10. Tashi endokba metet	- 5
15. _____ jang	- 6	12. Tzü manung senzüba	- 4

OLONG PAITEP # 5846 TELANGZÜBA

LANGTSÜNGLEN :	TIPILEN :
2. Kan, 3. IM, 5. Anüng, 7. Amsü,	1. Rebeka, 4. Adam, 6. Yohan,
8. Yosep, 10. Sara, 11. Isak, 13. Yakob,	9. Zü, 12. Sayutsüngir, 15. Ku,
14. Nana, 16. Noa, 17. Am.	16. Naman, 17. Abel, 18. Samuel.



Künü anogo Professor ka rong chanu ka nung mener Rongnir ka tena tzüyim ajanga aodang sensaksemer :

Professor : Nai Sociology, Astrology, Psychology mesüra yamala kar meteta lir ma?

Rongnir : Aya tulur nibo yamalaji kecha memetetba agiang rong anir ako. (Mapang talangka or külen tena amenba rongto tapok ka nungi tzü senoka aitagi rongto jogo tzü telongi tanem-tanemi aitsü tenzük)

Rongnir : Sir, naia Tzüwalogy Shia lir mali?

Professor : Waa, aji kechi?

Rongnir : Nai tanga logy sa aika meteta aloyonga Tzüwalogy meshira na tanübo teküzmzüker malitsüa no, goodbye!

Lilir : WhatsApp

TANÜBO NAI LANGZÜANG

Q. Koba Ministry ajanga Samagra Shiksha lapktsü?
A. Union Ministry of Human Resource Development
B. Union Ministry of Health
C. Union Ministry of Home Affairs
D. None

(Taruba adok nung onoki langzüksü)

YASHI ADOK TELANGZÜBA : 1993

AO OSHI ANGAZÜKDAK:

TANÜ ANGAZÜKTSÜBA OJANG



Kalok
 (v) tolok , kait (attach or fasten with a pin or pins)
 * Kiyir benjong nung kiyimsangi naro tajung ka **kalok**.

Kama
 (v) Tepi ana tsüngda lapokba (Spread apart)
 * Pai amendang teti tetsüng kamar amener.

NAI-A YA METETTER MA?

MAY 2021' NUNG SAYABA KEN TASEN KAR:

(Yashi adok nungi...)

JCoI Leray	- "Bout Me"
Coldplay	- "Higher Power"
Conan Gray	- "Astronomy"
CUCO	- "Forevermore"
David Guetta	- "Get Together"
BEXEY	- "Whiplash Moodswings"
Tommy Ice	- "Other Side"
Cautious Clay	- "Wildfire"
Priya Ragu	- "Forgot About"
Skrillex, Four Tet & Starrah	- "Butterflies"
St. Vincent	- "Down"
Elton John & Years & Years	- "It's a Sin"
Hanson	- "Annalie"
Demi Lovato	- "Met Him Last Night (Dave Audé Remix)" ft. Ariana Grande
Alicia Keys	- "Underdog (Remix)" ft. Nicky Jam & Rauw Alejandro
The Rasmus	- "Bones"
Green Day	- "Pollyanna"
Cher	- "Walls"
Danny Wolf & Lil Baby	- "Slidin"
Duran Duran	- "Invisible"
Alanis Morissette	- "Rest"

(Maneni asüng adok nung...)

SUDOKU # 5888

TELANGZUBA # 5887

5	3				7	9	2	7	1	6	4	5	9	3	8
9			3		4		1	6		8	3	9	7	2	1
2		1	9	6			8		4	5	6	9	8	3	2
7	9	4	2		5		3		3	2	4	5	7	8	1
			6				4		1	9	5	3	6	4	7
1	6			7	3	9	2		7	6	8	1	9	2	3
8		2	1	4			7		9	4	3	8	1	7	5
6		3	5	2		4	1		6	8	7	2	5	9	4
						5			5	1	2	4	3	6	8

OJANG LUTEP # 5432

MATASA :

ONYGI :

GAJUN :

SHIANSADGA :

LANÜK :

RYU :

ÜLSEN :

PARMAEN :

AKINY :

NZÜKTEANG :

OJANG LUTEP TELANGZÜBA # 5431

PEI DANG NUNGI TAMBU ALIBA AGI TELOK NUNG SADEMA MEJEMBI

TAN HOPTA ATEMA - KOMA SÜLA ?

Q. Private mozü kidang Covid agi shiranger anepaluba jenjang (treatment charges) ya government-i sensaker lenji tera oa latettsü nunga koma süla ?



Mumbai, June 16, 2021: Petrol aser diesel jenjang kanga atuba anema Bodhbarnü Mumbai nung aliba petrol pump ka nung Northeast Mumbai Congress züngsemtemi Amitabh Bachchan, Akshay Kumar, Anupam Kher aser Baba Ramdev nunger noksa amer longkak aitba noksa nung angur. UPA sorkar mapang nungbo totzü jenjang atuba anema parnoki ola adoka liasü saka tang NDA sorkar mapang nungbo totzü jenjang atuba atema parnoki ola madoker.

Covid Wave tasembuba atema Delhi nung lanur 5,000 nem training agütsütsü

New Delhi, June 16 (Agencies): Bodhbarnü Delhi Chief Minister, Arvind Kejriwal-i, coronavirus wave tasembuba mapang nung doctor aser nurse tem den yariteptsü atema Delhi sorkari lanur 5,000 nem training agütsütsü, ta metetdaksü.

June 28 nungi tenzüka shilem lemsar shilem shia lanur 500 nem training agütsütsü.

Health assistants mesüra community nursing assistants nem hopta ana nursing aser lifecare indang basic training agütsütsü.

Online ajanga osangbener den jembidang Kejriwal-i, "Iba telemtetba ajanga onoki

coronavirus wave tasembuba atema renemshiba jenjang tashi aittsü. UK densema alima nung tasembuba wave ajangshiba linüktem nung junga renemshia aliba nungi onoki tangazükba akatsü nukjidong lir," ta metetdaksü.

Training agitsüpurtemji class 12 pass bosa asütsüla aser arrshi küm 18 bosa asütsüla. Training atema online applications ji June 17 nungi agizütsü.

Coronavirus wave tasembuba mapang nung health assistants teyari agitsü aser parnoki mapa inyakba anogo apir taa agütsütsü, ta chief minister-i metetdaksü.

Training agiba mapang basic

nursing, paramedical, lifesaving, first aid home care, sample bendenba, oxygen concentrators aser cylinders amshibayim sayutsü.

Coronavirus wara anaben prokba mapang nung medical staff tem meperiba nung ajemdaker sorkari lanurtem nem training agütsütsü lemtet. Indraprastha University (IP) University den Delhi nung aliba medical institutes 9-i lanurtem nem training agütsütsü.

Delhi sorkari coronavirus wave tasembuba atema oxygen plants, oxygen concentrators, oxygen cylinders aser oxygen storage tanks renemdar, ta Chief Minister-isa metetdaksü.

India nung nisung 62,224 dak Covid putet aser 2,542 asü

New Delhi, Aami June 16 (Agencies): Tesüiba ghonda 24 tsüngda India nung nisung 62,224 dak coronavirus putet aser nisung 2,542 asü, ta Bodhbarnü Union Health Ministry-i metetdaksü.

Tang tashi nung linük nung nisung 2,96,33,105 dak coronavirus putetogo aser iba tashidak agi asür ajak agi 3,79,573 jungogo, ta health ministry-i metetdaksü.

India nung coronavirus agi shiranger anepba shilem 95.80 jungogo aser hopta shia iba tashidak putetba shilem 4.17 dang kümogo.

Tesüiba ghonda 24 tsüngda nisung 1,07,628 anepogo aser iba tashidak agi shiranger ajak senteper 2,83,88,100 anepogo.

Tang tashi nung linük nung nisung 26,19,72,014 nem coronavirus vaccine agütsüogo aser iba nungji tesüiba ghonda 24 tsüngda nisung 28,00,458 nem vaccine agütsüba densema lir.

Bodhbarnü Indian Council of Medical Research (ICMR)-i, June 15 tashi nung samples ajak senteper 38,33,06,971 tendangogo, aser iba nungji

Mongolbarnü sample 19,30,987 tendangba densema lir, ta metetdaksü.

Alima nung nisung ajak senteper million 176.5 dak coronavirus putet aser iba tashidak agi nisung million 3.81 dak tema süogo.

Mongolbarnü India nung nisung 94,052 dak coronavirus putet aser iba tashidak agi nisung 6,148 asü. Anogo ka kija nung coronavirus agi nisung timtiba asüba ya Bihar sorkari state nung iba tashidak agi nisung asüba tanaben asadanga asür 3,951 bendenlokba ajanga lir.

Tamalen Bihar health department-i, tanü tashi nung state nung coronavirus agi nisung 5,500 den tajemba süogo ta metetdakja liasü saka tanaben asadanga sülen iba tashidak agi asür 3,951 bendenlok. Tang tashi nung Bihar nung coronavirus agi nisung 9,429 süogo.

Tesüiba ghonda 24 tsüngda coronavirus tashidak timba putetba state temji Tamil Nadu (17,321), Kerala (16,204), Maharashtra (10,989) aser Karnataka (10,959) state tem lir.



Agra, June 16, 2021: Coronavirus anema tenokdangba kar agiena raliwalirtem atema Agra nung Taj Mahal tanaben lapoktsüba sülen kibong kati Taj Mahal anasa noksa tangokba angur.

Israel Embassy anasa bomb apokba ken o nung nisung ana bushir

New Delhi, Aami/June 16 (Agencies): Taküm January 29 nü New Delhi nung aliba Israel embassy anasa bomb ka apokba ken o dak sendakba nung National Investigation Agency (NIA)-i sayaba CCTV noksa nung ajemdaker nisung ana maitsüji jangjaba sülen aputsü atema nüburtem dang teyari meshiogo.

Nisung ana jagi ali nung bomb rema yutsü asütsüa akok ta bilemer, ajisüaka NIA-i sayaba CCTV noksa nungjibo tenati bomb rema yutsübaji tangoka mali.

Nisung ana jagi bomb rema yutsüba sülen iba tesemji toktsür

ao; iba sülen minute 15-20 shi lir tenati tema nung süboba süoshi kar semzüka yutsür tanabn iba tesem jagi arur.

Nisung ana iba tesem jagi tanaben arubaji bomb pokdaksütsü atema aru asütsüa akok, aser tenati tema nung asemba süoshi kar semzüker arubaji tena majitdaksütsü atema asütsüa akok, ta bilemer.

Osang angazükba agi, bomb apokba sülen nisung anaji autorickshaw nung aoer.

NIA-i CCTV noksaji sayaba sülen nisung ana maitsüji jangjar tenati pura sen lakh 20 senpet agütsütsü, ta NIA-i sangdong.

Nisung ana maitsü jangjartemi NIA indang email ID do.nia@gov.in mesüra info.nia@gov.in, phone no 011-24368800 mesüra mobile no 9654447345 ajanga tongteprateptsü akok.

Taküm January 29 nü Israel Embassy nung bomb apokba lendong nung nisung shinga masü mesüra meyiru, ajisüaka bomb apokba tesem anasa anena aliba gari asem raksa.

Bomb apokba ken o ya tamasabo Delhi Police matsüngdang benoka liasü saka taküm February ita nung NIA nem agütsü.

Myanmar linük nungi nisung 9,000 jena arua India nung jenoka lir

New Delhi, June 16 (Agencies): Tang Myanmar linük nungi ajenertem India nung maneni jenokba mapang nung Myanmar kübok Chin state nung Chief Minister, Salai Lian Luai-a India-i jena arua Mizoram state nung jenoka lir, ta police ketdangsertemi metetdaksü.

Luai ya tang jail nung alila-Myanmar nung democracy lenir Aung San Suu Kyi'er party, National League for Democracy (NLD) nung dena lir.

Anüolen Myanmar nung aliba Chin state ya Mizoram den arrtsüa lir aser ketdangsertemi ashiba agi, tang tashi nung Myanmar nungi nisung 9,247 tashi Mizoram nung jenoka lir aser parnok timbaka Zo nung lir.

Police-i ashiba agi, taküm February 1 nungi sepai yimsüsüba tenzüka sülen tang tashi nung Myanmar nung

yimtenren lenir 24 tashi arrtsü adena arua India nung jenoka lir.

Osangbener den jembidang police kati, "Hombar aonung Chin state chief minister international arrtsü adena arua Champhai jila tongogo," ta metetdaksü.

Mizoram nung lokti tentet balala aser kaketshir telok balalai Myanmar nungi jena arurtem nem tejenokdak aser chiyungtsü agütsür.

Mizoram police Crime Investigation Department (CID)-i ashiba agi, Mongolbar tashi nung Myanmar nungi nisung 9,247 tashi state kübok district 10 nung jenoka lir aser Champhai kija nung 4,156 jenoka lir, ta metetdaksü.

Myanmar nungi jena arur 9,247 nungjagi nisung 8,683 indang osang bendenogo aser nisung 564 indang osang bendentsü anünga lir, ta police-i metetdaksü.



June 16, 2021 nü New Delhi nung Defence Minister Rajnath Singh-i online ajanga ASEAN Defence Ministers' Meeting Plus (ADMM-Plus) senden nung jembiba noksa nung angur.

Spain nunger kati tetsü tepseter achiba atema tepuokdaki yok

Madrid, Aami/June 16 (Agencies): Spain nunger tebur kati pa tetsü tepseter achiba mechi küm 15 tepuokdak ayutsü obendang agütsü.

Arishi küm 28 tain Alberto Sánchez Gómez tetsür ki temeket nung police temi nisung temang shilem kar plastic container nung ngutetba sülen pa ya 2019 küm pua liasü.

Tetsü tepsetba mapang pa tekolok meshidak liasü, ta Sánchez-i achiba court-i magizüük.

Tang pa ya nisung tepsetba atema küm 15 aser nisung tasemang rangsaba atema ano ita pongu tepuokdak ayutsü.

Pa adianu nem temelen (compensation) sen €60,000 (\$73,000, £52,000) agütsütsü totuyuba agütsüogo.

Arishi küm 60 shi tain María Soledad Gómez atema bilemja medemer kati osang sangoktsüba sülen 2019 küm February ita police tem Madrid anüdoklen aliba ki ya bushia aru.

Ken o jembiba mapang, Sánchez yagi mangatetep adoka tetsü ya tekong nung lena südaksü, ta ashi. Iba mapang Sánchez ya arishi küm 26 liasü.

Iba sülen pai tetsü indang temang ya rangsa aser hopta ana shi la temang shilem ya achi aser kar par azü nem agütsü.

Iba lendong ya matalokdang pai tetsü dak züka merenshiba asoshi police temi pa jangja liasü aser pa apuba mapang ya pai tetsü anasai maotsü ozüing agüja aliba nung aibelener liasü, ta ashir.



Seoul, South Korea nung mapa inyakertem coronavirus prokshia aoba nungi kumzüksü mechi face mask agir mapa inyakba nung temolung lemtetsüsa tzüzüing-ozüing yanglujang ta takhangba agüja parnok kolak nungi kuo ongdokba mapang tangokba noksa ka yangi angur. Banner nung 'Onoki kechi südir süaka akoktsü' ta zülua amer aliba angur.

Sindh sorkari COVID-19 mozü magirtem SIM card nokdangtsü

Karachi, Aami/June 16 (Agencies): Pakistan kübok Punjab province nung ama Sindh sorkaria COVID-19 mozü agütsü memolunger indang mobile SIM card tem shibangtsütsü, ta Mongulbarnü sangdongogo, ta Mongulbarnü osang ka ajanga ashi.

Provincial capital nung vaccination centre ka semzüksüba sülen Sindh Minister for Information Syed Nasir Hussain Shah ajanga iba telemtetba ya metetdaksü, ta Geo TV ajanga ashi.

COVID-19 mozü magir indang mobile phone SIM tem yakta shibangtsütsü, ta pai ashi. Punjab province indang sorkari iba mesükba mera ya agir anogo ishika lir Sindh nunga iba osang ya sangdonger.

Nisung talila nem COVID-19 mozü agütsütsü mechi

Pakistan nung tashidak wara indang tentet tematiba, National Command and Operation Centre (NCOC) ajanga maneni tasa asem - pei sasa molungsoa, kechi südir süaka aser ajungshia - amshia mozü ya agidaktsütsü, ta osang ajanga ashi.

Pakistan nung Mongulbarnü nisung 1,000 dang tajemba dak COVID-19 puteta liasü, koba February ita sülen mezüingbuba alitsü.

Mongulbarnü Pakistan nung nisung 838 dak COVID-19 positive puteta tang linük nung iba tashidak agi meneper nisung 943,027 jungogo. Linük nung positive ratio ya shilem 2.39 nung lir. Kasa anogo coronavirus agi nisung 59 asüba sülen tang Pakistan nung iba tashidak agi asür ajak senteper nisung 21,782 jungogo.

Nepal nung tzüinglu kanga sashia aru, nisung tenet asü

Kathmandu, Aami/June 16 (Agencies): Nepal nung tzüinglu kanga sashia aruba ajanga nisung tenet asü aser ano nisung 50 samar bushir, tzümetsüing kanga sashia adok aser ki-o-jen tongtipang aika raksatsü, ta ketdangsurtemi Bodhbarnü ashi.

Taoba ghonda 48 tsüingta tzüinglu kanga sashia aruba agi tamajungtiba kongshiba districy ji Nepal tiyonglen Sindhupalchok ya alitsü, kong Melamchi ayong ya metsüingbanga liasü. Sindhupalchok ya Nepal yimtiba, Kathmandu nungi kilometer 65 shi pilar lir.

Nisung asür ajak ya Sindhupalchok nungi liasü.

Asürtem temang ya Mongulbar aonung ngutetogo.

Nisung 50 jungnüa samar bushir, shirnok timba Melamchi Drinking Water Project nung mapa inyakertem lir, ta ketdangsurtemi Bodhbarnü ashi.

"Melamchi aser Indrawati ayongtem nung tzümetsüingba sülen nisung 50 dak tema samai bushir. Tzümetsüing yagi Melamchi drinking water project indang tzünokdang, Timbu Bazaar, Chanaute Bazaar, Talamarang Bazaar aser Melamchi Bazar raksatsü," ta Minister of Health and Population Sher Bahadur Tamang-i Facebook nung zülüja liasü.

Nisung asüba dang masü, saka Sindhupalchok nung gari senzüba apu ana aser suspension bridge (sangzüa

aliba apu) trok shi raksa. Alu aser ango metsüba tesemtema metsüingbang.

Helambu jila nung police post ka, aser Melamchi nung Armed Police Force Camp aser Drinking Water Project den tzümetsüing agi tesendaktep mali kumogo. Melamchi ayongkum nung aliba ki 300 dak tema pongzüker ogo.

Nepal Police, Army aser Armed Police Forces temi tekumzükba aser teyari agütsüba mapa inyaker, ta Sindhupalchowk indang Chief District Officer, Arun Pokharel-i ashi.

Hombar nikongdang nungi central Nepal nung aliba Bagmati aser Lamjing province tem nung tzüinglu maneni arur.

Israel sepaitemi Palestine tsür ka Jerusalem anasa khaset

Jerusalem, Aami/June 16 (Agencies): Jerusalem northeast tsütsü Palestine tsür kati gari anir nisung dak atsüksü merangba mechi Israel sepaitemi khaset, ta Israel mitkar sangdong ka nung ashi.

Palestine nunger osangbenertemi asüla ya Abu Dis nungi arishi küm 29 tain doctor azünger Mai Afanah, ta jangjaogo, aser Bodhbarnü lendong atalokba tesem nung pa dak injang agi akha aser azü yima yutsü.

Jerusalem northeast tsütsü Hizma jila anasa tetsür kati Israel sepaitemi telok ka alidak la mena aliba gari agi atsüksü merang aser iba sülen gari nungi kotari ka amer alu, ta mitkar sangdong ka nung ashi.

Israel sepaitemi ka tera yiru, ta Israel nunger osangtem ajanga ashi. Palestine health ministry ajanga tetsürla ya yiruba zübu agi asü, ta ashi.

"Hizma nung Israel sepaitemi injang agi akhanba

tetsür ka asüba osang ya Palestinian civil liaison ajanga health ministry nem metetdaksüogo," ta sangdong ajanga ashi aser occupied West Bank nung mitkar aser civilian ken o atema parnoki Israel den amalitep akar, ta metetdaksü.

Social media nung prokshiba video ka nung jilai aidak Afanah indang ta ashiba gari tazüing ka liasü. La dak akhaba sülen iba tesemi ambulance kata maru, ta Palestinian nunger osangtem ajanga ashi.

Tawa Israel sepaitemi Palestine nunger nisung aika tepsetogo aser parnok yagi kotari agi atsüingtsü merangba aser gari gari nung mener nisung dak atsüksü merangba agi lir, ta ashir.

Lendong timtem agütsütsü jenjang nung mesüaka Israel sepaitemi Palestine nungertem taochi mesayur tepseter, ta Palestinian rights group ajanga aitsür.

1967 küm Israel-i Jerusalem anüdoklen amokbangba temaitsü Jewish nationalist temi occupied East Jerusalem nung jajaba sülen tensa mejungi aliba mapang Bodhbarnü iba lendong ya ajurur.

Kasa mapang Gaza Strip nungi tapoktsü oset inoka aliba balloon tem yokba sülen Israel-i iba tesem nung tayimtsü amshia amak.

Aonung sangwa tayimtsü amshia amakba nung tesem anatsülen nisung asüba osangbo mali, koba Israel-i May ita nung anogo 11 tashi Gaza nung bomb pokloksüba sülen ataloker, kong tanur 66 densema Palestine nungi nisung 256 asü.

Israel-i anogo 11 amakba mapang Palestine nunger telok balalai Israel nung rocket khaloktsüba nung tanur ana densema nisung 12 asü. Linük balala tetsüingtai aita May 21 nü ceasefire benoka iba azüdokshi ya tembanga liasü.

Occupied West Bank kübok Jenin jila nung taoba Brehostibarnü khatetpa mapang Israel special forces temi Islamic Jihad ka aser Palestine security officer ana tepseta liasü.

Mongulbar aonung Israel mitkar indang tayimtsü agi Gaza City aser south tsütsü Khan Younis jila nung Hamas compound tem amak aser Gaza nungi kiralongra mapa maneni inyakra raratsü renema lir, ta Israel mitkartemi sangdong ka nung ashi.

Gaza nungi balloon nung tapoktsü oset inoker yokba ajanga Gaza anasa nisung alidak moabu nung mi 20 tashi jangrudaktsüba telangzüba agüja amak, ta mitkartemi ashi.

Hamas odongtar katia Israel nungeri amakba ya jangjatsü aser Palestine nungertemi maneni tasü ita pei temenden aser Jerusalem nung temeshi tesemtem wazüka ayutsü atema nokdaksü, ta

ashi.

Benjamin Netanyahu-i Israel ato kilonser ama küm 12 inyaka arur right-wing nationalist Naftali Bennett-i aniba teloktep sorkar ka Deobarnü tenteter anogo ana lir iba lendong ya ataloker.

Israel nunger far-right nationalist aser pro-settler telok temi occupied East Jerusalem nung nüburtem jashitsüsa jajaba ya sorkar tasenbai Hombarnü mela liasü.

Mongulbarnü nisung meyrirjang aika East Jerusalem nung nisan ayiptena "Death to Arabs" (Arab nunger dangi tasüba) ta yimyim ayima jaja, aser iba yongji Palestine nungertem ain adoka aitsü.

Ano Israel nunger longkak aiter kari Palestine nunger anema "Ner yimtsüing mi agi rongdokang," ta ayimtena liasü.

"Kin anema yimyim ayimer ya Israel nübur asoshi maksü lir," ta Foreign Minister Yair Lapid-i Twitter nung aija liasü.

**GOVERNMENT OF NAGALAND
DIRECTORATE OF INDUSTRIES & COMMERCE
NAGALAND : KOHIMA**

Admission Notice for the Academic Session 2021-22

Online applications are invited from eligible candidates for Admission to 'Diploma in Tool & Die Making' Course (4 years specialization course in Tool Design and Manufacturing & equivalent to 3 years Diploma in Mechanical Engineering) at Nagaland Tool Room & Training Centre (NTTC), Dimapur.

Eligibility:

- Class 10th Passed.
- Age should be between 16 to 19 years. (90% seats reserved for SC/ST candidates and also relaxation of three years in the upper age limit).

Registration can be done ONLINE at
<https://nttcdimapur.org.in/>

Apply on or before 30th June, 2021

- Stipend amount of ₹ 500/- p.m. during the course or ₹ 600/- p.m. NEC stipend for meritorious students of HSLC exam.
- Incentives from the Institute for merit students (Semester wise) & students with 90% and above in attendance (Month wise).
- 70% & above in HSLC result - Direct & free admission.
- Company allowances between ₹ 8,000/- to ₹15,000/- p.m. in the 4th year during On-the-Job-Training/Industrial training period outside the State.
- Earning while learning Scheme shall be extended to willing candidates.
- Students of Diploma in Tool & Die Making are eligible for SBI Education Loan.
- 100% placement assistance in Private/Govt. Sectors.
- Hostel seats available.
- Registration fee ₹. 200/-.

For further details, visit the website: <http://www.nttcdimapur.org.in> or contact the following
Course Coordinators: 7005162525 / 8787364436.
(Reception desk 8257002079)

**Sd/- Shri. K. Hokishe Assumi
Director**

• Website: www.nttcdimapur.org.in • Email-ID nttcdimapur@gmail.com

NTTC, New Industrial Estate, Sub-Jail Junction (Tinali), NH-36 Diphu Road, Dimapur: Nagaland

MULUNGNEN O



ASO:
20.03.1956

ASÜ:
08.05.2021


Onok taküm jenjang yanglutsüla temeim oyala, **M.I.AKUMLA LONGKUMER** (UNGMA) mapang tatsüka timtema lir iba akümüli wadang atemba anogo, alima tensa tamajung liaka shirnokisa aria bilema temeim shisatsü tener nubo, rongsen aser sarasadem agi yaritepogo, nenok ajak dang kangasa pelaba metetdaksür aser teyanglur Tsüngremi nenok mapa tajung asoshi maneni moajangma.

Lokti, kija balala aikati yariogo nenok ajak tenüng iba zulu nung madoktsüteter, saka mepaidoktetba kar adoktsür,
1) Dr. Temjenpokba Longkumer, Olive Christian Hospital Dimapur
2) Mr. N. Lipok Jamir, Pastor, Diphupar Ao Baptist Arogo, Dimapur

Temeim Adianutem aser kinungertem

Kodanga Mamatetba

Obala Lolensubo Longkumer
(03/02/1969 - 13/06/2021)



Temeim Oba,

"Liyonga aodang mapangi tejashi aser nüktzü nembangtsüsü, saka na onok den aliba kodanga mamadoktsü."

Onoki kanga meimba kinungbo aser obala shiranga aliba mapang nungi pa akümüli tembangba anogo tashi ana aser talang nungi kija, kibong aser lokti tentet shirnokisa nubo, rongsen, sarasadem, mapang agi ozü yariogo, nenok ajak Taküm aliba Tsüngremi moajang ta ozüi sarasademtsür. Nenok teyari onoki kodanga mamadoktsü.

Temeim,

Kinungsü, Chirnurtem aser Kinungertem.

Happy Birthday

Tenüng : **Mapumeren Lemtur**

Tasoba anogo : 17th June


Küm : 9 Talidak : Tuli.

Taküm tajung aser arishi talang ya Tsüngremer temoatsü. Tanü ya tepelatiba anogo rongnung ka ta züngshia onoki jabaso Tsüngrem metetba nung Tsürapur akümtsübuba tanur ka intetjangni ta tepela tasoba anogo bilemteta sarasadema moatsür.

Temeim Oba & oja.



Assam Rifles-i kija aser lokti balala nem teyari agütsü



parnok mapa tajung asoshi tenüngsang agütsüogo.

Kasa mapang nung Assam Rifles, Jalukie Battalion-i, June 16 nü Peren District kübok Old Chalkot nung, shishilembadak, dokantem aser yimtsüng nung administrative building merektetsüogo.

Assam Rifles-i COVID -19 tashidak menatapa aoba nokdangtsü atema, shishilembadak, nüburtemi teti semdangba dokan aser hotel tem aser Old Chalkot nung village council senden amendak administrative building merektetja liasü.

Merekmejuba mapang sepaitemi face mask asema, hand sanitizers amshiba aser tetsüngda ita inyaksangshiba amala COVID-19 dak sendakba yimayimpong tapet benoka inyaksangshio. AR-isa, iba sentong ayongzüka agiba mapang faces mask aser hand sanitizers lemja liasü.

Dimapur, Aami/June 16

(TYO): HQ IGAR (N) kübok Assam Rifles, Phek Battalion-i, June 14 aser 15 nü Phek District Hospital nungi teyari meshiba sülen teyari agütsüogo.

Meluri jila nung mashisa aliba tetsür ka temang nung tintem adokba sülen District Hospital Phek-i anir ao. La A+ve azü nüngdaka liasü, ajisüaka lar kinunger aser District Hospital-i azü anepalu

mesütet.

Iba sülen aonung ayaterem nung Assam Rifles, Phek Battalion dang parnoki teyari meshi aser sepa anati azü tenla agüja tetsürla taküm kümzüik.

Ibala mesükba tatalokba ka nung June 15 nü sepa aseme azü tenla agütsü aser iba ajanga tetsür ka taküm kümzüka liasü.

AR-i teyari agütsüba kibong anaprongla aser civil medical staff temi, Phek Battalion nem

'Ramayan,' actor Chandrashekar süogo

Aami/June, 16, 2021

(Agencies): Actor tejen Chandrashekar, shiba "Cha Cha Cha", aser "Surang" amala film aser nüngtugu TV serial "Ramayan" nung Arya Sumant shilem agiba atema ajaki jangjaa lir, pa Bodhbarnü süogo. Pa arishi küm 98 liasü.

Chandrashekar, Mumbai nung par kidang Bodhbar anepdang 7 ako shi nung asü, ta par jabaso aser producer Ashok Shekhar-i PTI dang ashi.

"Pai aginüba ama kinungertem ajak adenshia lia pa süogo. Pa temang nung kechi timtem paliasü saka saseta asü.

Pa taküm kanga junga liogo," ta Shekhar-i ashi.

Chandrashekar den asüpila sentong Bodhbar nikongtsüsü Juhu, Pawan Hans crematorium nung agiogo.

Chandrashekar ya Hyderabad nung aso aser 1950s tetenzüklen film industry nung shilem agi tenzüik aser iba sülen 1954 küm V Shantaram indang "Surang" fim nung mezüngbuba shilem agia liasü.

Iba sülen pai "Kavi", "Mastana", "Basant Bahaar", "Kaali Topi Laal Rumaal", aser "Barsaat Ki Raat" amala nüngtugu film tem nung shilem agiogo.

1964 küm pai mezüngbuba "Cha Cha Cha" film produce asüba den direct süa liasü, kong actor tejen Helen-i shilem agia liasü.

1987 küm Chandrashekar-i, DD mythological show "Ramayan" nung shilem agi. Iba show ya Ramanand Sagar-i direct asü.

Chandrashekar, shiba 1990s tetenzüklen tashi nung movie 250 dak tema nung shilem agiogo, pai 1972 nungi 1976 küm tsüngda writer-filmmaker Gulzar indang film Parichay", "Koshish", "Achanak", "Aandhi", "Kushboo" aser "Mausam" nunger yangluba nung teyari agüja liasü.



Kiphire district nung tang vaccine agia aliba sentongtem asadangtsü atema DC Conference Hall, Kiphire nung June 16 nü District Task Force, Kiphire-i ayongzüka DH, CHC aser PHC Medical Officers tem senden ka menogo. Senden nung züngsemtemi grass root level nung Covid-19 vaccine agütsüsü atema renemshia aliba akangshitsü atema sensak asema den block ajak dang nüburtem tonga oa maparentem benoka inyaksü metetdaksü. Maneni line department tem dang yikdaklitem nem covid vaccine dak sendakba nung osang tejangja agütsüsü metetdaksüogo.

Euro: Portugal aser France-i pei tata asaya kokogo



Euro championship nung Hungary aser Portugal na tsüngda asayaba mapang Portugal nungi asayar Cristiano Ronaldo-i goal yokba noksa nung angur.

Aami/June 16, 2021

(Agencies): Mogolbarnü Puskas Arena nung Portugal-i goal 3-0 agi Hungary madak takok nguogo. Iba asaya nung Cristiano Ronaldo-i goal ana idakja pa European Championship nung goal timtiba idaktsüba asayar kümogo.

Ronaldo-i European Championship nung goal 10buba minute 87buba nung penalty ka ajanga idaktsü aser tanabuba goal mapang apuloktsür asayaba mapang idaktsü. Pai Euro asayamung

pongu nung goal 11 idaktsür lir. Asaya metenzük tsüngda pai goal 9 idaktsür Michel Platini den kasasa liasü.

Ronaldo-i pa asoshi mezüngbuba goal midaktsü tsüngda Portugal defender Raphael Guerreiro-i team atema mezüngbuba goal idakja liasü.

Asaya tenzük minute 80buba nung Hungary atema substitute Szabolcs Schon-i goal ka idaktsü ajisüaka pa offside asüba ajanga goal magi.

International goal timtiba indaktsür alisang Iran nung

striker Ali Daei, goal asem agi dang Ronaldo-i memenepi lir. Daei-i goal 109 idaktsür lir.

Mongolbarnüsa France-i goal 1-0 agi Germany madak takok nguogo.

Asaya tenzük minute 20buba nung Lucas Hernández-i Mbappé nem agütsüba ball ka metsütoktsü merangba mapang Mats Hummel-i par goal telung nung ball metsüoktsü aser iba goal yagi France-i asaya akok.

"Iba asaya ya titans tem tsüngda rara ka liasü," ta France coach Didier Deschamps-i ashi.

Kasa mapang nung German coach Löw-i, "pa dak tai metongloktsür. Onok tia makaba dang. Ball kanga kara aru aser Mats atema ball metsütoktsü tasak liasü," ta ashi.

Asaya nung team anapronglai goal idaktsüsü atema maangka angu saka midaktsütet.

Asaya tanabuba shilem nung Mbappé aser Karim Benzema nati goal kaka idaktsü saka goal anaprongla offside liasü.

Germany team taruba asaya Portugal den asayatsü aser France team Hungary den Budapest nung asayatsü.

Warner, Maxwell, Cummins nung WI & Bangladesh den masayatsü

Aami/June 16, 2021
(Agencies): Tawa IPL nung asayaba Australia nung asayar tenet West Indies aser Bangladesh den asayatsü aliba asayamung nung shilem magitsü.

Iba asayamung ana ya taküm küm tatem T20 World Cup atema team renemshiba nung shilem ka lir.

David Warner, Pat Cummins, Glenn Maxwell, Jhye Richardson, Kane Richardson, Marcus Stoinis aser Daniel Sams nung iba asayamung ana nung asayatsü atema parnok manioktsü asüngdangogo aser kasa mapang nung Steve Smith-a IPL asayaba mapang tekatsüla yiruba anepalutsü atema meshim, ta Cricket Australia-i ashi.

Iba jenjang agiba ajanga coach Justin Langer atema asayatem shimtsü tasak asütsü, kechiyong T20 World Cup atongtsü ita pezü anung lia team nungi asayar tajungtiba tenet shimtsü asoshi parnok azünga malitsü.

Asayamung ana atema Cricket Australia-i Bodhbarnü asayar 18 tenüng sangdongogo. Australia team July 9 nungi 24 nü tsüngda T20I pongu aser ODI asem asayatsü.

Bangladesh den T20 asaya pong asayatsü sentong yanglur aliba ya ano mejangjai lir.

Cummins, Maxwell, Warner, Stoinis aser Richardson nung IPL thinenba ajanga India nungi linüki meyapa arur quarantine asüba, taoba ita tatemlenang tembanga kidangi ogo. Australia-i India nungi arurtem nem tenokdangba agütsüba ajanga Australia nung asayatem kidangi mao tsüngda Maldives nunga hopta ka mongzüktsüsa aküm.

IPL nung asayar tanungba tem dang nungi Richardson hopta asem jelia quarantine süa aliba hotel toktsür ao, kechiyong pa, Adam Zampa aser AJ Tye nung den sorkari tenokdangba magütsü tsüngda India toktsür ao. Richardson-i iba asayamung ana nung shilem magitsü telemtetba agiogo, ajisüaka Zampa o Tye nabo asayatsü.

IPL nung shilem agiba sülen tawa-ang quarantine tembanger liaka Jason Behrendorff, Moises Henriques aser Riley Meredith nungeri asayamung nung shilem agitsü telemtetba agiogo.

National selector Trevor Hohns-i, "Australian team

atema item asayatem shimtsü asoshi maangka maliba atema tezüdanga bilemer, ajisüaka asayamung nung shilem magitsü atema telemtetba agiba asayatem telemtetba NSP-i akhümtsübur," ta ashi.

"Steve Smith tekatsüla yirur aliba ajanga meshim, aser pa anisüngzükba ajanga World Cup aser Ashes Series asayatsü asoshi temang tajungba kümer atatsü," ta paisa ashi.

Australia team June 28 nü West Indies-i aotsü, kong parnok St Lucia kübok Darren Sammy Stadium nung T20I pongu asayatsü aser Barbados kübok Kensington Stadium nung ODI asem asayatsü.

Sentong yanglur aliba atalokra parnok Bangladesh den T20 pongu asayatsü.

Australia squad: Aaron Finch (c), Ashton Agar, Wes Agar, Jason Behrendorff, Alex Carey, Dan Christian, Josh Hazlewood, Moises Henriques, Mitchell Marsh, Ben McDermott, Riley Meredith, Josh Philippe, Mitchell Starc, Mitchell Swepson, Ashton Turner, Andrew Tye, Matthew Wade, Adam Zampa.

Travelling reserves: Nathan Ellis, Tanveer Sangha.

Dhankar tepsetba ken o nung Judo Coach ka apu

Aami/June 16, 2021

(Agencies): Chhatrasal Stadium nung arishi küm 23 tain Sagar Rana tepsetba ken o nung Delhi Police-i judo coach Subhash puogo. Iba ken o nung wrestler Sushil Kumar aija puogo aser Delhi court-i temelaba agütsüba sülen pa June 25 tashi judicial custody nung ayutsü, ta ANI-i metetdaktsü.

Wrestler Sagar Dhankar tepsetba ken o bushitsüngdangba police team-i, iba ken o nung Ukraine tsür ka densema alitsü ta ashiba sülen tang judo coach Subhash puogo. Police temi ashiba agi, Dhankar aser Sushil Kumar na tsükchitep adenba ya tetsürla mechi nung asütsü akok. Bushitsüngdangertemi Ukraine tsür la dang ken o ashishitsü asatepdar kechiyogn lai wrestle nana tsüngda mangatettep adokba indang kuli agütsütettsü akok, ta Times of India sangdong ka ajanga metetdaktsü. Tetsürla ya kong ali aji jangjaogo aser osang ajanga shiba agi, lai Model Town nung Sushil indang flat mapangshia semdanga liasü.

June 6 nü Delhi Police Commissioner S N Srivastava-i, police-i scientific kulitem dak ajemdaker ken o benoktsü ta shiogo, kong Sushil Kumar'er kidang DVR/CCTV, mobile clip, azü melanger aliba süoshi aser fingerprints densema lir.

Delhi Police Commissioner-isa, police dang item kuli makai ken o mebenoktsü shiogo. Senden tembangba sülen Sushil Kumar dang ken o ashishitsü atema psychiatrists anisemtsü ta paisa metetdakja liasü.

Sushil Kumar aser pa nem teyari agütsürtemi ali kimong ka mechi Sagar Dhankar aser par medemer Sonu Mahal o Amit Kumar na dak May 4 aser 5 aonung azük. Iba sülen arishi küm 23 tain Dhankar mapa tatsüka lir asü. Kumar aser pa nem teyari agütsür ka May 23 nü Mundka tesem nung apu.

Police-i, iba ken o nung aija alirtem rongnung tongtibaji Sushil Kumar ta shiogo aser parnoki Dhankar dak sung agi azükba kuli lir ta ashi. Social media nung prokshiba noksa ka nung Kumar aser pa nem teyari agütsürtemi nisung ka dak sung agi azükba nguogo.

ICC Test rankings: Steve Smith temaba jenjangi tuogo



pa Smith (891) dang nungi point pongu agi tajemba kümogo aser pa batsmen tem rongnung tang tanabuba jenjang nung lir.

Test asaya nung bowler tem rongnung Australia nung fast bowler Pat Cummins (908 points) sülen India nung spinner Ravichandran Ashwin tanabuba jenjang nung lir.

Bowler tem rongnung India nung rongnungi top 10 nung Ashwin kija züngoksema lir.

Test all-rounder rankings nung West Indies nung Jason Holder-i rating point 412 nguteta pa temaba jenjang nung lir aser India nung asayar Ravindra Jadeja (386 points) aser Ashwin (353) na tanabuba aser pezübuba jenjang nung lir.

New Zealand nung asayar Matt Henry-i point 307 nguteta jenjang 64buba tongtetogo aser Ajaz Patel-ia point 323 ngutetogo. Devon Conway-ia maneni kanga junga asayaa jenjang 61buba tongtetogo.

Kasa mapang nung South Africa aser West Indies na tsüngda mezüngbuba test asaya tembangba sülen SA nung asayar Quinton de Kock-a Cheteshwar Pujara den külemi jenjang 12buba tongtetogo aser Adrian Markram-a jenjang 14bubai tuogo.

Bowler tem rongnung Kagiso Rabada jenjang ana tejakdangi tua 7buba nung lir aser Anrich Nortje-a top 30-i iogo.

Aami/June 16, 2021

(Agencies): Bodhbarnü sayaba ICC Test rankings nung Australia nung batsman Steve Smith temaba jenjangi tuogo. Kasa mapang nung India team captain Virat Kohli pezübubai tuogo.

Kohli, shiba lenisüba kübok India team World Test Championship final nung New Zealand den asayatsü lir, pai point 814 nguteta lir.

Top 10 nung India nung asayatem rongnung wicketkeeper batsman Rishabh Pant (747 points) aser opener Rohit Sharma (747 points) na lir. Sharma aser Pant na prongla jenjang trokbuba nung lir.

Smith-i New Zealand captain Kane Williamson ajateta temaba jenjang tongtetogo.

Williamson, shiba yiruba ajanga England den tanabuba Test asaya nung shilem magitet,

BILEMDANGANG

"Ochi mashi inyakyim ajak khenbosa jungkai adoktsü."